

■ COLUMNA

Nadal rumantsch


DA ROMAN CAVIEZEL

Ma in quels dis d'vantet, ch'ün decret get oura dals guvernatur da la Lia cha tuot ils Rumantschs gnissan dumbrats. Ins vuleva finalmain savair cun tschertezza quant derasads ch'ils fantastics gens rumantschs sajan sin l'entir mund. Per l'execuziun pratica era previs in pelegrinadi a Cuira da l'entir pievel, ina spezia da hadsch rumantsch.

Etuots giaivan per esser Erassegnats, scödüna sco el pudaiva. Ma eir il valerus Giohannes da Purtenza get in la chapitala, perche l'eira d'vantat president da la Lia, damai capo da tut ils Rumantschs en l'univers. Ensemen cun sia mugliera, che n'aveva betg num Maria ma Ruth e n'era betg gravida, èn els sa preschentads a la porta da la Kaba Rumantscha sper la Plessur, inua che tut ils Rumantschs vegnivan regi-strads.

Stop! Davant l'isch era in guardian sursilvan cun tschera engrugnida ed impediva l'entrada als nov arrivads, smanand ina tarmenta clav. Sur quella sava passan mo Romantschs autentics! Num e mussament da naschienscha, ni plaid da passar! (Quella alternativa era il fritg d'ina liberalisaziun da la lescha dal sang cun la mira d'integrar ils Rumantschs assimilads da libra voluntad.)

Al Gualser doc Giohannes restava nagut auter che la fugia enavant. El era



cuntent ch'ins na fageva far el in examen d'admissiun. Grazia a tut ils predis tegnids en sia carriera da plevon era el zuar a ti per ti cun ina buna part da la cultura indigena, aber sch'el avess stuì per exempel recitar in verset d'uffants sco Enica penica pumperte, divi davi domine ni pronunziar correctamain num locals rumantschs sco: Rabius ni Rueun, fiss quai forsa stà la catastrofa. Basta.

Giohannes da Purtenza, e consorta. Password (tgi che sa englais sa dapli): Pro idioms!

Alleluja! Tuccau la nota. (Qua vesan ins fitg bain che la conuschientscha da ses utschels vala almain tant sco la derivanza rumantscha.) Bien di, bien onn, sar Gion, mo vinavon. Seigies beinvegni el sanctuari romantsch, ha ditg il gorilla e tuts trais èn entrads.

En la chasa n'avevi ni asen ni bov, ed anc pli pauc in pursepen. Percunter giascheva in bellezza cudesch d'aur traglichant sin in pitschen altar amez la sala. L'objet du désir da tut ils pelegrins ru-

mantschs. E dasperas steva David, il capodumbrader, cun fatscha rienta. Gea, el era cuntent da mintga visita, schebain ses calvari dueva anc durar mais ed onns. Pau-per diavel.

Emera en quest mument as preschentet in angel e la gloria dal Segner splendorit intuorn el. Tuts tmettan cun granda temma, ma l'angel, Gabriel da num e responsabel da public relations da funcziun, disch ad els:

Non tmarai, perche eu s'annunziesch üna grand'allegrezza che tuot il pövel avrà. Hoz s'ais arrivà il spindrader dal rumantsch, ch'ais Giohannes d'Aschera!

Noss purtenzer ha stritgà, cun duida modestia, bufatg sur sia barba da profet, ha guardà en la camera ed ha ditg:

Jau declar acceptar l'elecziun! Precis sco la divina purschala. Cun agid dal songt Spiert vegn jau a spindrar per vus la Rumantschia. (Gugent avess el aschuntà: Jau hai già spindrà bler auter! Aber lur è vegnì endament ad el l'institut a Ftan.)

Ed in quel istant füt qua üna quantitat del'exercit celestial (persunal da la Lia) dschand:

Gloria ad Urs e Duri nella bainvulientscha invers ils Rumantschs! Er invers quels da Pro rumantsch.